

ՈՒՍՄԱՆ ԱՆԱՌԱԿ ԶԱՎԱԿՆԵՐ

Ֆիզիկական մշտնջենավոր տառապանքի դատապարտված Սիզիֆն ու աստվածային տանջանքի ենթարկված Պրոմեթևսը գրույց էին անում:

— Բախտավո՞ր է քո ցեղը,— ստորերկրյա անդունդից հարցրեց հսկա Սիզիֆը, շարունակելով քարեր շարտել դեպի [վերև] բարձր լեռան գլուխը, որոնք կրկին ցած էին գլորվում և նա դարձյալ այսպես անվերջ վերև էր ձգում:

— Ո՛չ, անբախտ է իմ ցեղը,— բարձրից որոտաց աստվածների շղթայակապ գերին:

— Նրանք է՞լ են քարեր ձգում դեպի վերև, որ [կրկին ներքև] միշտ ցած են ընկնում,— կրկին հարցրեց չարատանջ հսկան:

— Ո՛չ,— պատասխանեց Պրոմեթևսը,— դրանից էլ ավելի վատ: Նրանք իրանց սրտերն են ձգում դեպի վերև, և այն ընկնում է ցած, նրանք իրանց հոգիներն են ձգում դեպի վերև, և հոգիներն ընկնում են ցած, իրանց մտքերն են ձգում դեպի վերև, և այն մտքերն ընկնում են ցած...

Ճակատագրական զարհուրելի անեծք, որ դրված է մտավոր աշխատանքի գործի վրա:

Ճշմարիտ, որքա՛ն դանդաղ են հաղթանակում մտքերն ու զգացմունքները. այնքան դանդաղ, որ կարծես թե ապարդյուն են անցնում:

Այսպես [դժվար] ծանր է եղել կուլտուրական առաջադիմության ուղին, այսպես դժվար է եղել փչացած մարդու վերանորոգությունը:

Բայց մենք այդպես չենք սովորել մտածել ու հասկանալ, այդ հուսահատական է մեր անհամբեր սրտերի և մեր ազատ թռչող մտքերի համար: Մտավոր հեղաշրջումները մեզ համար մի տեսակ ֆեյերվերկներ են եղել—հեշտ ու արագ, հանկարծակի ու արմատական... մենք [տեսել ենք] ականատես ենք եղել փոթորիկների, որոնք խառնել են իրերը, փոխել են գրությունները, ձևերը, տարազները... մենք հավատացել ենք, որ ամենայն ինչ կատարյալ է, և մինչդեռ միամիտ հրճվելով տոնում էինք բարձր ու

լուսավոր մտքերի հաղթանակի տոնը, ահա հենց այդ երջանիկ ցնծության ժամանակ, իրերի ճշմարիտ ոգուց և բնավորությունից - լսվում է ճակատագրական հառաչանքը - այն մտքերը դարձյալ ընկել են ցած...

Ահա ձեզ Թիֆլիսը: Մի՞թե [Թիֆլիսը] նա չի ներկայացնում մի այդպիսի մեծ հանգած հրախաղի տեսարան, ուր կարճատև շլացուցիչ լույսից զրկված թամաշավորները միայն այժմ են զգում, որ իրանք ոչ մի գիտակցական մասնակցություն ու կենսական դեր չունենին [սարքված] անցած հանդեսում, ուր այնքան աղմկում էին: Եվ ամեն մարդ գնում է իր տունը, իր մութ գործին:

Այն մարդիկը, որոնք առիթ են տվել այս տողերին մեր [մեզ համար] կյանքի համար կարևոր մարդիկ են [համարված] նկատված, նրանց վրա թանկ հույսեր կան դրված [և նրանք ընդհանուր առմամբ համարված են նահատակներ...]

Դրանք ուսուցիչներ են. այս իսկի գրչի սխալ չի, **ուսուցիչներ** եմ ասում: Նրանք մտել են կյանքի մեջ հայտնի հրահանգով ու ծրագիրներով, որոնցով հայտնվում են որպես լուսավորության առաքյալներ, վայրենի բարքեր կրթող, բարոյական սկզբունքների ջատագով ու ծավալող և անհաշտ ոխերիմ ամենայն խավարային գործերի:

[Մենք միշտ լսել ենք - նրանք նահատակներ են, ուսուցչի անունը խաբեց շատ]

Նրանք նահատակներ են - մենք միշտ այս լսեցինք:

Բայց կյանքը գաղտնիքներ [չի] պահելու սովորություն չունի, նա կատարում է յուր անտարբեր ընթացքը, երևան է հանում ամեն բան, և գործերը հայտնվում են իսկական պատկերներով: Դուք տեսնում եք, որ այդ երևակայական նահատակը ո՛չ միայն անբարեխիղճ ուսուցիչ է եղել, և փոքրոգի մարտնչող, այլև վաշխառվի պնակալեզ արբանյակն ու [նրա հրեշավոր] մուրհակների գրագիրը, և կեղեքիչ պաշտոնյայի պատրաստակամ գործակատարը, իսկ հաճախ հենց մի քստմնելի վաշխառու:

Ամեն մարդ, ես հավատում եմ, որ կարող է սրանցից մի քանիսին հիշել:

[Բայց] Սրանցից ավելի տխուր պատմություն ունեն այն «ուսում առած» երիտասարդները, որոնք քահանա են դարձել: Նրանք այն գաղափարական նպատակով քահանա դարձան, որ ժողովրդին բարձրացնեն իր ընկած դրությունից, իր եկեղեցուն հավատարիմ ծառայեն և այսպիսի հազար ու մի խոստումներ, որ անդադար անում են նրանք և միշտ էլ [հիշում] ակնարկում իրանց խնդիրքների մեջ, թե մանկության օրից ուխտած են. . .

Բայց էլ գաղտնիք չի, [դրանք] որ այդ խոստումները միայն մի տեսակ կաշառ էին նպատակի հասնելու համար, իսկ նպատակը եղել է հեշտ ապրել և գոփել [եկեղեցու անունով] ժողովրդին ավելի անաստված, քան յուր հանգուցյալ տգետ նախորդը: Պսակի ժամանակ հարսանքատերերին խեղդել, թաղման ժամանակ մեռելատերերին կողոպտել, շարունակ լաց լինել քրիստոնեության համար և միշտ որոնել ու հնարել եկամուտների նորանոր աղբյուրներ:

Ուրիշ ի՞նչ փոփոխություն մտավ մեր հոգևոր դասակարգի մեջ սրանցով և արդյոք մեղմացա՞վ ժողովրդի արդար տրտունջը—արդյոք ժողովուրդը Ավետարանի իմաստը հասկացա՞վ:

Պակաս [վտանգավոր] չեն այն ինտելիգենտ մարդիկ, որոնք սկսում են պարապել վաճառականությամբ: Դրանք էլ խիղճ ու գիտություն վաճառում են առաջին մուշտարուն և այնուհետև ճգնում են գերազանցելու իրանցից առաջ եղող փերեզակին: Չէ՞ որ վաճառական է—պրծանք գնաց:

Ներսիսյան դպրոցն ավարտած մի պարոն, որ վաճառական է դարձել, ծիծաղելով պատմում էր, թե 40—50 տոկոս աշխատանքով է ծախում իր ապրանքը և աշխատում էր մեզ զարմացնել, թե ինչ ճարպկություններով է կարողանում խաբել տգետ մուշտարիներին:

Կան, որոնք թղթակից են — գրում <են> սուտ ու բամբասանք, որ անարգեն, անվանարկեն մեկն ու մեկին՝ անձնական վրեժ լուծելու համար: [Եվ շատ հասկանալի է, թե որքան <3 անընթ. > վնասակար է այս ընթացքը, որ գործերին տեղյակ մարդկանց

աչքում գցում է մամուլի վարկը]: Մոլորեցնում են մամուլը, խաբում հազարավոր ընթերցող մարդկանց և տպագրական խոսքի [վարկը] արժեքը վայր գցում: Երանի թե միայն եղածը խեղաթյուրեին—դրանով չեն բավականանում, չեղած [սուտ] չլսված բաներ են հնարում:

Կան [որոնք] «ուսում առած» պաշտոնյաներ զանազան հաստատությունների մեջ, և դարձյալ նույն կաշառն ու նույն չինովնիկությունը, որ իսկի չէինք մտածիլ նրա մեջ:

Սրանց մեծ մասը այնքան էլ հիմար չեն, որ իրանք արածը հավանելի կարծեն: Դրա համար էլ մի մարդու պատահելիս գիտեն դուրեկան հառաչանքներ արձակել, խոսել իդեալական բաներից և խնջույքներում հոտնկայս զանազան թանկագին ազգային կենացներ խմել ու տաք խոսքեր ասել:

Կան և այնպիսիները, որոնք **լոթիանա** խոստովանում են իրանց ընթացքը և աշխատում են [մի կերպ] բացատրել ու արդարացնել կյանքի պահանջներով, շրջանով, կարիքով և այլն:

Ումանք էլ ուրացած ու մոռացած ամեն անցյալ, և ամեն կապ կտրած, ցինիկաբար ծաղրում են, գլուխները շարժելով ծիծաղում են, որ իրանք էլ մի օր բռնված են եղել այդ **քամիներով**:

Բայց չէ՞ որ այս մարդիկը գրքեր են կարդացել, ուսում են առել, կրթվել են... [Հապա] Ի՞նչ եղան այն բոլոր ուսուցիչների, գրողների, հրապարակախոսների ջանքերն ու ազդեցությունները, ի՞նչ եղան այն մտքերն ու զգացմունքները, որոնցով երբեմն ոգևորվում էին սրանք:

— Այն մտքերը դարձյալ ընկել են ցած, այն զգացմունքները դարձյալ ընկել են ցած:

Ընկել են ցած... Այնտեղ կայան չկա մաքուր մտքերի ու սուրբ զգացմունքների համար, և ահա դարձյալ մութն է, սառն ու ահեղի, ուր շարունակ հեծող թշվառության վրա ծափ է տալիս, քրքջում [ու] է գազան կեղեքիչը, ոտնահարում ու բարձրաձայն ծաղրում ամեն բան, ինչ որ վեհ ու մաքուր է աշխարհքում: